

„Drei Blecher voll Kuche“

Am 24. November 2009 is im Temeschwarer AMG-Haus de 40. Geburtstach vun der „Pipatsch“-Seit gefeiert gin. Die Feier han mer mit eem Kuchewettbewerb abschloss.

Wie mer uns des anfang han, mit dem Kuchewettbewerb, wars uns nit grad allesens. Weil mer jo nit gewisst han, ob unser Schwoweleit mitmache. Als erschti hat sich die Verwalterfamilie ausm Bogaroscher Kinerheim angetraa, for de ereignisvolle Tach Kuche zu backe. Un so sin ich mit schun was Sichrem ins AMG-Altenheim gang, un han dorte mol gsaat, was mer vorhan. Ich saan eich, die Leit ware so begeischtert vun dere Idee, die Bäsl Anni hats Zepter gschwung un zu ihre Angestellte gsaat: „Mir helfe mit! Jeder vun eich backt drei Blecher voll Kuche!“ Sie is zum Telefon un hat die AMG-Sozialeinrichtunge in Billed un Semiklosch verständicht: „Jeder kummt mit drei Blecher voll!“ Sie han allerhand gebackt: Schweinsohre, Schneeballe, Nusskipfl, Kässternche, Käs- un Äpplitta.....

Un des mit dene Blecher hat sich rumgered. Beim Banater un Temeschwarer Forum, bei de Ortsforen, beim Temeschwarer Liederkranz un Herbststreigen, bei der Temeschwarer Volksuni. Die Bäsl Ute (DFDB) hat Kuche noh eem sächsische Rezept, die Bäsl Dagmar (DFDT) noh schwowischem Rezept gebackt. Die Bäsl Brunhilde vun der Kondi Astrid in Billed e Baamstamm un vill anri Mehlspeis, die Doina Oma aus Wojteg zwaa Tortne un kleeni Mehlspeis. Mei Kumradin, es Gerda, hat sich ach vun de „drei Blecher“ ansteche gelosst un aus Detta sin gleich meh Kischtle mit Kuche kumm. Der Kuchewettbewerb hat „Welle gschlaa“ un sich sogar im Saarland rumgered. Vun dorte is die Bäsl Ramona Lambing angereist (sie stammt aus Orzydorf) un hat e schwowischi Spezialität „ghackti Kipfle“ gebackt.

Wie die Leit anfang han de Kuche beizubringe, sin em die Aue iwegang un es Wasser im Maul zammgeloff. E veertl Stund, bevor mer uns im AMG-Feschtsaal treffe han selle, sin de Lenauheimer Richter un sei Stellverteter mit Pappedeckle voller Kuche ankumm. Un wie ich gsiehn han, wie die Bäsl Roswitha un Bäsl Brunhilde aus Billed un die Bäsl Dietlinde aus Semiklosch e Wägelche voller Kuche in de Videosaal (dorte is de Kuche zammkumm) ninschiewe, han ich mer gedenkt: Reiß dich zamm, aldes Haus, spur dich in de Saal un fang an zu rede. Die Kullegre were des mit dem ville Kuche schun schaukle! Un des han se dann ach gemacht.